

PEJADOW NOS KERNOWEK (KS)

Re wrello an Arlùth Ollgalosek grauntya dhyn nos cosel ha dyweth perfeth. **Amen.**

Tôwlowgh warnodho ev oll agas fienasow, rag yma va orth agas cara why. *1 Peder 5:7*

Tewel a wrer hag ombredery adro dhe wharvosow an jëdh.

A Dhuw, an Tas, **kebmer mercy ahanaf.**


A Dhuw, an Mab, **kebmer mercy ahanaf.**

A Dhuw, an Spyrans Sans, **kebmer mercy ahanaf.**

A Drynsys Venegys, sans ha gloryes, **kebmer mercy ahanaf.**

Re gemerro Duw Ollgalosek mercy ahanaf, re wrello gava dhybm ow fehoso ha'm ledya bys i'n bêwnans eternal. Amen.

Y hyllyr cana hymphna.



AN SALM (*Y hyllyr ùsya onen an Salmow-ma inwedh: Salm 4, 24, 46, 67, 91 bô 121*)

- 1 Dewgh, benegowgh an Arlùth, oll why servysy an Arlùth, usy ow sevel i'n nos in chy an Arlùth.
- 2 Drehevowgh agas dewla tro ha'n tyller sans ha benegowgh an Arlùth; gwrëns an Arlùth agas benega in mes a Sion, an Arlùth neb a formyas an nev ha'n nor. *Salm 134*

Re bo gordhyans dhis, a Dhuw, agan Formyer, agan Savyour ha'gan Spyrseth, i'n tor'-ma ha bys venary. Amen.

REDYANSOW IN MES A'N SCRYPTÛR SANS

De Sul, degolyow, ha dhyworth Dëdh Nadelek bys Degol Stool Crist yw an imach a'n Duw na yll bos gwelys. Ev yw an kensa genys a oll Creacyon, rag ino ev y feu formys kenver tra in nev hag i'n nor, taclow hewel ha dywel. Pùpra a veu formys dredho ev ha ragtho ev. Kyns ès pùpra dhe vos creatys yth esa Crist, hag ino ev yma pùpra keskelmys warbarth. *Colossyanas 1: 15-17*

De Lun Jesù a leverys dh'y dhyscopyls: 'Why yw golow an bës. Cyta a veu settys wàr veneth, ny yll bos cudhys, na ny vëdh cantol anowys ha gorrys in dadn vùshel, mès wàr goltrebyn, ha nena hy a wra gul golow dhe gebmys a vo i'n chy. Indella gwrëns agas golow terlentry dhyrag tus, may hallens y gweles agas oberow dâ, ha gordhya agas Tas usy in nev.' *Mathew 5: 14-16*

De Merth Jesù a leverys: 'Rag hedna me a lever dhywgh: na vedhowgh prederys adro dh'agas bêwnans, pandr'a vydnoggh why debry bô eva, na bêth moy adro dh'agas corf, pandr'a yllowgh why gorra i'gas kerhyn. A nyns yw an bêwnans moy ages sosten, ha'n corf moy ages dyllas? Merowgh orth ydhyn an air: ny wrowns naneyl gonys has, na mejy, na cùntell in skyberyow, saw yma agas Tas i'n nev orth aga maga. A nyns owgh why polta moy a vry agessans y? Na vedhowgh ytho prederys a'n jëdh avorow—rag an jëdh avorow a vydn dry anken anodho y honen. Lowr dhe'n jëdh hedhyw yw y dhrog y honen.' *Mathew 6: 25, 26, 34*

De Merher hag in termyn an Pencost Me a vydn scùllya dowr glan warnowgh, ha why a vëdh glan dhyworth oll agas avlanythter. Ha me a vydn ry dhywgh colon nowyth. Me a vydn kemeres dhe ves an golon a ven in mes a'gas corf ha ry dhywgh colon a gig; ha why a vëdh ow fobel vy, ha me a vëdh agas Duw why. *Ezekiel 36: 25a, 26, 28b*

De Yow hag in Asvens Bedhowgh dyfun ytho, rag ny wodhowgh màn pana dermyn a vydn mêster an chy dos tre, gordhuwher po hanter-nos, po orth terry an jëdh po myttyn. Bedhowgh dyfun rag own ev dhe dhos dhesempys ha'gas cafos why in cùsk. An pëth esof vy ow leverel dhywgh why, me a'n lever dhe genyver onen: bedhowgh dyfun. *Mark 13: 35-37*

De Gwener, i'n Corawys hag i'n Seythen Sans Rag y feu oll lanwes Duw plesys dhe drega ino ev. Dredho ev Duw a veu pës dâ dhe gesseny pùpra ganso y honen, i'n nor kyn fe hag in nev. Duw a wrug cres inter y honen ha'n bës dre woos y Vab i'n growspren. *Colossyanas 1: 19-20*

De Sadorn hag in termyn an Pask Yth esa Duw kebmys ow cara an bës, may whrug ev ry y Unvab, ma na wrella mos dhe goll den vëth a gressa ino, mës cafos an bêwnans heb dyweth. Ea, ny wrug Duw danvon y Vab aberth i'n bës rag dampnya an bës, saw may halla an bës bos selwys dredho ev. *Jowan 3: 16-17*

Degol Sans bò Sanses Abàn eus cloud mar vräs a dhüstuniow adro dhyn, gesowgh ny dhe settya adenwan pùb sawgh ha pùb pegh usy ow clena mar glos orthyn. Gesowgh ny dhe bonya gans perthyans an resekva usy dhyragon. Gwren ny meras orth Jesù, rag orto ev yma agan fëdh ow cregy dhia an dalleth bys i'n dyweth. *Ebbrowyon 12: 1-2a*

CANTYKYL IN MES A'N AWAYL – Nunc Dimittis

**Gwith ny yn saw, a Arlùth, in tewolgow an nos-ma,
rag an wlascor heb dyweth, may fëdh golowys ow tewynya bys vycken ha bys venary.**

1 I'n tor'-ma, a Arlùth, yth esos ow tanvon dha servont dhe ves
in cosoleth warlergh dha lavar.

2 Ow dewlagas ow honen re welas dha sylwans
a wrussys parusy dhyrag fäss oll an poblow;

3 May halla bos golow dhe wolowy an Jentylys
ha glory dhe'th pobel Israel.

**Gwith ny yn saw, a Arlùth, in tewolgow an nos-ma,
rag an wlascor heb dyweth, may fëdh golowys ow tewynya bys vycken ha bys venary.**

AN PEJADOW

**Agan Tas ny eus i'n nev,
benegys re bo dha hanow.
Re dheffo dha wlascor.
Dha vodh re bo gwrës
i'n nor kepar hag in nev.
Ro dhyn ny hedhyw agan bara a bùb dëdh oll,
ha gav dhyn agan cabmweyth,
kepar dell eson ny ow cava dhe'n re-na usy ow cul cabmweyth war agan pydn ny.
Ha na wra agan gorra in temptacyon,
mës delyrf ny dhyworth drog.
Rag dhyso jy yw an wlascor, ha'n gallos, ha'n gordhyans,
bys vycken ha bys venary. Amen.**

Y hyllyr gul pejadow rag taclow ha tus dyvers obma hag y hyllyr leverel collectys erel inwedh.

**Gallos ha confort an Tas re bo genen pùb termyn;
Jesù an Mab, leun a ras, socor ny mo ha myttyn;
An Spyrans Sans benegys y ras genen may kyffyn;
Maria, Mabm ha Gwerhes, dhe vercy Duw pës ragon.**

Pejadow Sylvester Sans – Beunans Meriasek

Re wrello an Arlùth agan benega, agan gwetha rag oll drog, ha'gan dry dhe'n bêwnans heb dyweth. Amen.

Me a vydn growedha in cres ha cüsca kefrës; rag te dha honen, a Arlùth, a wra dhyn trega in sekerder *Salm 4:8*

Notyansow: Y hyll den udnek leverel Pejadow Nos rag oll an re-na usy tregys in chy. Gwell yw y leverel heb fysky, hag y coodh tewel tabm wosa redya kenyer salm. Pan vo an offys-ma levery gans tus warbarth, an leder a lever versyow dybarow an salm ha'n cantykyl, ha'n re erel a wra y wortheby gans an versyow leven-nyverys. Pùbonen a lever an geryow in prynt poos. 'Gurab tú mo boile' bò Brestplât Padryk Sans yw hymnys Keltek hag yw pòr dhâ dhe leverel dhyrag an salm. An offys-ma re beu sensys sempel, may halla va bos remembrys, hag indella wâr an dyweth bos radn a rythym naturek an pejadow kenyer jorna.

Cowethas Peran Sans yw cowethyans ecûmenek a Gristyon Gernowek, usy hy esely ow whelas convedhes hag incarnatya i'ga bêwnans spyrysecter an Sens Keltek a Gemow, kevradna an spyrysecter-na gans tus erel, ha kerdhes dhe voy tender wâr an dor hedrogh-ma. Mar mynta desky moy adro dhe'n Gowethas, kê dhe www.peransans.org le may fëdh clôwys an gurgân dre vayn gorhevren. Mar nys yn y dhe vos dasgwerthys, y hyllyr gul coplow a'n offys-ma heb cubmyas dhyrag dorn dhyworth Cowethas Perans Sans. Y hyll an offys bos kelys in Kernowek inwedh.